



Imiphumela yekhovid-19

Siswati



Notozi Mgobozi

Imiphumela yeKovid-19

Ibhalwe ngu Notozi Mgobozi
Umdvwebi ngu Heidel Dedekind



Thabo ngumfana loneminyaka lesiphohlango, ufundza esikolweni salabancane eDuma lesisePienaar. Waveta luvo lwakhe kuMake wakhe nebangane bakhe ngeCovid-19.

Kusekucaleni kwethemu lensha, Thabo wesaba kubuyela esikolweni emva kweliholide lelidze, ngoba wati bantfwana labatsatfu laba bebatseleleke ngalombulalave.



Ucele imvumo kuMake wakhe kutsi angayi esikolweni ngalowo Msombuluko ngobe uphetfwe sisu futsi akafuni kufa, kepha make wakhe walile. Ulinge wonkhe emacebo lekanawo emgodleni, kepha make wakhe akamange akhweshe.

Wasukuma ngekutfukutsela, wageza eshawa, wagcoka watsatsa sikhwama sakhe sesikolo ngentfukutselo, nanguya aya esikolweni nesifonyo ebusweni.

Utse nakafika esikolweni, wacaphela luntjintjo ngendlela tintfo tenteka ngayo. Utse nakafika esikolweni, wacaphela luntjintjo ngendlela tintfo tenteka ngayo. Wangena emgceni lowu bewungaphandle kweligede lesikolo amangele.



Wabutisisa kulabanye bafundzi ngaloku lakubonako neluntjintjo. Bamtjela kutsi bahlolwa lizinga lekushisa baphindze babutwe imibuto ngetemphilo yabo.

Uma kufika sikhatsi sakhe, thishela watsatsa lizinga lakhe lekushisa, bamcela kutsi avule tandla, bamfafata ngesanithayiza. Babese bamcondzisa egumbini lakhe.

Nalapho wahlangana nalenye intfo
lengaketayeleki lapho bangane bakhe bahleti
khashane kunalomunye, bonkhe bafake tifonyo
ebusweni .

Thishela wachaza kutsi tintfo titawentiwa
njani kusukela nyalo kuye phambili neluntjintjo
lelitakwenteka ngesikhatsi sekudlala.

Emuva kwekuphuma kwesikolo, waya ekhaya
angakajabuli asabela imphilo yakhe ngoba
kunyenti loku bekakuhlelele imphilo yakhe.

Nakafika ekhaya, watjela make wakhe liciniso
kutsi yini ndzaba amkhohlisile ekuseni.

Nanobe kunjalo, bekufanele kutsi aye esikolweni
malanga onkhe ngaphandle kweticoliso.

Waphindze watfola lesinye sitatimende lesishacisako egumbini, kutsi sikolo sitawuvalwa ngebafundzi labatselelekele nekushona kwalabanye bothishela. Lesincumo sitsetfwe kusindzisa bafundzi kutsi bangatseleleki.

Tikolo tavalwa kwesikhashana kute kutfolakale sikhatsi sekufutsa nekutsi kuhlantwe ngemitsi yekubulala ligciwane.



Lesimemetelo sikhuphule lizinga lekwesaba kulabanye bafundzi nabothishela.

Lesinye simemetelo besitsi bonkhe bothishela labaneminyaka lengemashumi lasitfupha nekuya etulu kufanele basebentele ekhaya ngobe imphilo yabo isengcupheni lephakeme. Bantfu bafile, bantfu bebatfukile, laba bebatselelekile bebahlukaniswa nalabanye emalanga lalishumi nakune.

Kwasabalala tindzaba ngalobhubhane kuwo onkhe maphephandzaba, imisakato nakutinkhundla yekuchumana, kunikwa tibalo tebantfu labafile, labatselelekile nalabasindzile kuleligciwane. Thabo bekatfukile angasafuni nekuphumela ngaphandle kwelikhaya lakubo, besekatibona naye atselelekile.

Umongameli wenta timemetelo ngesimo selive, loku kwatfusa wonkhe umuntfu.



Thabo wabuya esikolweni ngalelinye lilanga, watjela make wakhe kutsi babatjele kutsi sebatoya esikolweni ngemalanga lahlelewe ngekwehlukana kwelibanga neligumbi ngalinye, ngesizatfu sekuhlala ngekuchelelana kute bagweme kutselelana. Wamemeta watsi, "Hey make! angiboni kutsi ngitawuphila lomnyaka, bengititjele kutsi ngiyoba ngumfundzi weLibanga le- 4 kulomnyaka lotako. Ngifisa ngatsi lobhubhane angaba yintfo leyengcile."

Make wakhe wahlala phansi naye, wambonisa kutsi yonkhe into kulomhlaba inesikhatsi, kufanele silindze kute kulunge konkhe sitekwati kutsi ngutiphi tincumo letifanele titsatfwe esikolweni kuya embili. Thabo ulahlekelwe litsemba asesemncane. Tikolo tivuliwe taphindze tavalala ngenca yetizatfu letahlukene. Letinye tikhatsi bafundzi bahlala emakhaya inyanga yinye nome timbili futsi bonkhe bajabha kakhulu.





Lomunye webatali watsi, “kufuna sikhuleke ngalesimo ngobe tintfo tiya ngekuba timbi kakhulu.”

Thishela wabakhutsata watsi, “Konkhe loku kutawendlula; asihlalani etsembeni. Bafundzi kufute bafake emandla emsebentini wabo wesikolo ekhaya nasesikolweni. Silindze ngekulangetelela kuphela kwemnyaka kubona kutsi kutawentekani ngemnyaka lotako. Lona ngumlandvo longeke ukhohlweke kuwo wonkhe umuntfu.”

Sitawube sicoca ngalesipiliyoni seCovid-19 nalabanye bafundzi eminyakeni letako, kutsi itsikamete njani tikolo nemhlaba wonkhe yawubeka ngaphansi kwekucindzeteleka.

“Kunentfo yinye kuphela leletsa kwesaba kimi, kushiswa kwetikolo. Ngite siciniseko kutsi sikolo setfu sitawuphumelela kulesimo,” kusho Thabo.

Lokwedlulele nje, thishela wetfu umane wasibuta kutsi sikhetsa kuba yini uma sesikhulile. Ngimtjele kutsi ngifuna kuba nguDokotela wetilwane, ngoba ngitsandza tilwane.

Labanye bafundzi abasafuni kubuyela esikolweni nyalo, ngiyatibuta kutsi batowaphumelelisa njani emaphupho abo nabangafuni kufundza.”



Tikolo tificine tivuliwe emva kwelikhefu lelidze,
nebatali babitwa emhlanganweni lapho
bebayococisana ngemhlahlandlela.

Thishelanhloko wabatisa kutsi bonkhe
bothishela nebafundzi laba bebatselekile
sebaphilile, kute batali bangakhatsateki
ngekuphepha kwebantfwana babo ikakhulukati
uma balandzela imitsetfo yekuphepha.

Bothishela nabo bekufanele balandzele imitsetfo yekuphepha egumbini lekusebentela labothishela kute bagweme kutselelana. Balalela lebabelana ngako ngalokwenteke emagumbini ekufundza, kuphatamiswa bafundzi ngesikhatsi sekufundza.




Bayakhononda bodvwa ngesikhatsi mine ngisemkhatsini ngifundzisa. Mcebisi wamemeta, “Mbuyiselo ukhwehlela angakabeki sandla emlonyeni.” Ngisatsi ngiyaphendvula, Nomonde amemete,” thishela, Sonwabile akakafaki sifonyo kepha uloku uchubekile uyatsemula.” Kwadzingeka ngimise sifundvo sami ngikhulume ngalesimo.

Kukhatsateka kwaThabo ngesikolo kuyachubeka, akasalali ngendzaba yemaphupho lamabi ngelubhubhane. Namake wakhe ukhatsatekile abuka indvodzana yakhe ihlupheka iba nekwesaba.

Thishelanhloko wesikolo wenta konke lokusemandleni akhe kwehlisa kukhatsateka emkhatsini wabothishela nebantfwana.

Thabo wacela make wakhe kutsi amsite kubhala inkhondlo lebeyiloku isengcondvweni yakhe. Batsetse emalanga babhale lenkhondlo bate bayicedza. Watsatsa lenkhondlo wayiyisa esikolweni wacela thishela wakhe kutsi ayifundzele ligumbi lonkhe.



Ngiyasaba

Mine ngetfukile
Namake wami futsi wetfukile
Nathishela wami futsi
Wena awuketfuki?



Sivile ngalomashaya buhce wesifo
emsakatweni
Sisibonile kumabonakudze
Sifundza ngaso kumaphephandzaba
Siva nebantfu bakhuluma ngaso
emphakatsini wetfu





Lesi sifo singumbulalave nami ngetfukile
Ngisaba kuyovakashela bangane
Ngisasaba nekudlala nebangane bami
Ngisaba kuya esikoklweni
Ngisaba nekuya edolobheni
Ngisevalweni



Ngisaba kulwela emalungelo ami
Ngisaba kwabelana ngeluvo lwami
Angisakwati ngisho nekubukela imidlalo yami
lengiyitsandzako
Imvelo yonkhe iphila ngekwesaba
Kungako nginalokwesaba





Lomashaya buce ungebele intfokoto yami
Lomashaya buce ungebele emalungelo ami
Lomashaya buce utsetse imiphefumulo
yebangani bami
Utsetse imiphefumulo yebatali nebantfwana
Ngisabela impilo yami

Ngigeza tandla njalo ngemanti nensipho
Ngitsatsa yonkhe imibandzela lebekiwe
Ngihlala ngigcoke sifonyo sami
Kodvwa ngisayisaba iKhowid-19
Hambela khashane Khowid-19, Hambela kudze,
Ngifuna inkhululeko yami





Ngidzinga impilo yami ibuye
Ngikhulekela inkhululeko yebantfwana
Kuletikhatsi letetfusako letingenalo litsemba
Ngibonga iNkhosi ngekuphepha kwami
Ngetfukile! Ngetfukile! Ngetfukile!



Siyatsemba kutsi Kuyoba nelikhambi
Bodokotela batawulitfolo likhambi
Lomashaya buce utawuphela
Siyophindze sitfokote futsi.



EMAVI EKUBONGA

Ibhalwe ngu

Notozi Mgobozi

Umdvwebi ngu

Heidel Dedekind

Umhleli 1

Ntombikayise Njadayi

Umhleli 2

Nelisa Mviko

Umhleli 3

Nopasika Xapa

Umhleli wetifombe

PixelPing Design

Mhumushi

Roster Chambale

Mcinisekisi welizingasimo

Patricia Faith Mathe



ISBN 978-0-638-00804-3



basic education
Department:
Basic Education
REPUBLIC OF SOUTH AFRICA

